

04 FEB 2001

Rumah Terbuka (Bergambar)

LEBIH 40,000 ORANG BANJIRI RUMAH TERBUKA KEBANGSAAN PERTAMA

PULAU PINANG, 4 Feb (Bernama) -- Lebih 40,000 orang dari dalam dan luar negara membanjiri Lebuhraya di sini untuk bersama-sama pemimpin negara menghadiri rumah terbuka kebangsaan yang julung-julung kali diadakan sempena Tahun Baru Cina.

Perdana Menteri Datuk Seri Dr Mahathir Mohamad dan timbalannya, Datuk Seri Abdullah Ahmad Badawi dan isteri masing-masing, Datin Seri Dr Siti Hasmah Mohd Ali dan Datin Seri Endon Mahmood merupakan tetamu khas pada majlis itu.

Mereka disertai oleh Menteri Kebudayaan, Kesenian dan Pelancongan, Datuk Abdul Kadir Sheikh Fadzir, timbalannya Datuk Dr Ng Yen Yen serta Menteri Pembangunan Luar Bandar, Datuk Azmi Khalid.

Selain Ketua Menteri Pulau Pinang Tan Sri Dr Koh Tsu Koon, Menteri Besar lain yang turut hadir ialah Menteri Besar Perak Datuk Seri Tajol Rosli Ghazali, Menteri Besar Kedah Datuk Syed Razak Syed Zain dan Menteri Besar Perlis Datuk Seri Shahidan Kassim.

Majlis rumah terbuka itu dianjurkan oleh kerajaan pusat melalui Kementerian Kebudayaan, Kesenian dan Pelancongan dengan kerjasama Kerajaan Negeri Pulau Pinang dan Majlis Persatuan Belia Kongsi Pulau Pinang.

Majlis itu telah dimeriahkan dengan persembahan Orkestra Simponi Pulau Pinang yang mengiringi penyanyi Elaine Kang.

Turut memeriahkan majlis itu ialah pertunjukan tarian singa oleh kumpulan Kon Seng Keng dari Muar, Johor, serta persembahan kebudayaan dari Istana Budaya, Kuala Lumpur.

Terdahulu itu, Dr Mahathir menyampaikan "ang pau" kepada lima rumah kebajikan iaitu Rumah Kanak-kanak Bakti Kepala Batas, Salvatian Army, Rumah Anak-anak Yatim Pulau Pinang, Pusat Perlindungan Kanak-kanak Pulau Pinang dan Rumah Anak Yatim Ramakrishna.

Beliau turut menyampaikan hadiah kepada pemenang gerai makanan terbaik dari hotel yang dimenangi oleh Hotel Shangri-La Rasa Sayang, diikuti Hotel Evergreen Laurel dan Hotel Penang Mutiara.

Dr Mahathir kemudiannya dibawa melawat Masjid Acheen di Lebuhraya, Rumah Berhala Yap, Khoo Kongsi, Cheah Kongsi dan rumah Dr Sun Yat Sen di sekitar Lebuhraya Armenian.

-- BERNAMA

NER SA ZB